

**Ahmad Zahid Tiba Di Kemboja Untuk Lawatan Tiga Hari  
Bernama  
Julai 28, 2011  
Daripada Rhoma Ahmad Razali**

PHNOM PENH, 28 Julai (Bernama) -- Menteri Pertahanan Datuk Seri Dr Ahmad Zahid Hamidi tiba di sini Rabu bagi lawatan rasmi tiga hari bagi menggalakkan Program Wakaf Al-Quran Sedunia.

Rombongan Malaysia yang menaiki pesawat C130, Tentera Udara Diraja Malaysia (TUDM), tiba di Pangkalan Tentera Pochetong di sini pada pukul 7.35 malam.

Mereka disambut oleh Presiden Yayasan Pembangunan Umat Islam Kemboja, Othman Hassan, yang juga setiausaha Kementerian Sumber Manusia dan Latihan Vokasional, dan Mufti Kemboja Oknha Sos Kamry.

Ahmad Zahid diiringi oleh Panglima 4 Divisyen Mejar Jeneral Datuk Zulkiple Kassim, Penasihat Ketenteraan kepada Menteri Pertahanan, Briged Jeneral Datuk Md Dzahir Abdul Rashid Bakar serta beberapa pegawai kanan Angkatan Tentera Malaysia (ATM).

Turut menyertai program lawatan itu adalah beberapa peserta Program Wakaf Al-Quran Sedunia yang terdiri dari warga ATM dan Yayasan Restu.

Program Wakaf Al-Quran Sedunia dianjurkan ATM dengan kerjasama Yayasan Restu.

Ahmad Zahid dijadual mengagihkan 10,200 naskah Al-Quran kepada masyarakat minoriti Islam di negara itu esok sebelum membuat kunjungan hormat ke atas Perdana Menteri Kemboja Samdech Hun Sen dan rakan sejawatnya Menteri Pertahanan Kemboja Tea Banh.

Program Wakaf Al-Quran Sedunia yang merupakan susulan daripada program siri pertama "Al-Quran Sinar sejagat" Wakaf Al-Quran untuk Dunia, dilancarkan Perdana Menteri Datuk Seri Mohd Najib Tun Razak tahun lalu.

Ia bertujuan menghasilkan Al-Quran untuk diwakafkan ke negara-negara yang mempunyai minoriti umat Islam.

-- BERNAMA

Hakcipta Terpelihara © 1995-2011 Star Publications (Malaysia) Bhd (Co No 10894-D).  
Source: <http://www.bernama.com/bernama/v5/bm/newsgeneral.php?id=604413>